

A PROPOS DE L'QUESTION SOCIALE

MONOLOGUE

interprété par M. J. FAUCONIER, au « Théâtre Wallon »

Est-i possible qui volà câsi six meie ans
Qu'on s'crêvinte chal so l'terre po magnî n'crosse di pan !
Qu'on s'fait dè mâva songue, qu'on s'kitrâgne, qu'on s'fait l'guerre,
Qu'on n'sét s'veie viker nouk, qu'on s'kwire totes lè misère,
Et çoula fâte di quòè : c'est l'ovrège et l'ârgin
Qui sont câse qui tos frès si k'hagnet comme des chin ! —
Les Empereurs, les Pâpes, les Royes et leus Minisse
N'ont mâie situ d'accoérd avou l'collectivisse ;
Et pourtant, quòè qu'on deie, n'est-ce nin là l'idéal,
Li seul rimède à monde po r'fer l'mâ gènerâl ! . . .
N'aveûr qu'on grand caser, sins ouhènes ni fabriques,
Sins usteies, po n'rin fer, sins fôges ni mécaniques ;
Viker di l'air dè timps, tos rintis, nou bribeux,
Rin qu'ine grande colonèie . . . comme li cisse di Lierneux.
On sèreut tos essonles, enn on grand bèguinège,
Sins maisses po no k'mander et l'zi fer leus ovrège.
Les censes et les pèces d'ôr, les billets, les actions
Ni comptrit pus po rin, on n'si chèvreu qui d'bons ;
Volez-ve avu çouci, di çoula n'n ave mèsâhe
So l'côp, avou vost bon, vos âriz vost binâhe ;
Adon qu'asteur sovint, so tot i v'fât gèiri
Vos n'âriz nou tourmint po v'logi ni v'moussi !
Pus d'mèhin ni d'souci po payi ses patintes
Pus nou frais d'locâtion, nou dangi po ses rintes ;
Tot sèreut bin réglé, à chaskeune si p'tit lot,
Pus d'riches ni d'pauves so l'terre, pâr égale à turtot ! . . .
Vola, po l'fin d'nost siêke, li pus grande des îdeie,
Sâver l'humânitè d'on trèvin sin pareie ! . . .
Et dire qui v'la des ans qu'on k'wire ine sôlution
Po résoûde on problème, qu'est résoûlou à fond.

Qu'est-ce qui geine po l'moumint ; c'est l'ârgint et l'ovrège
Et bin j'âreu vite fait, et sins baicôp d'arège,
Ji freus voter âx Chambres qu'à pârî d'tél moumint

On n'ouveurreut pus nouk et qu'n'âreut pus d'ârgint !
N'a rin d'pareie asteur qui dè loè radicale
Po côper d'vins s'récène li puf'kène gènerâl ! . . .
Adon v'veuriz so l'côp les grands si fer tot p'tits,
Et noss terre di misère fer blâme à Paradis !
Chaskeune âreut s'crameu, avou n'gamelle et n'losse
Et pus nolu n'oès'reu si fer n'couhène à s'gosse ! . . .
On magn'reu tos pareie, tot fou dè minme chaudron,
Sins aveur, onck dè l'vache, l'aute dè l'châr di mouton !
On sèreut tos logis so des lêts d'ordonnance
Comme enn a déjà quéquonque chal à noss Permanence.
On âreut po s'caler turtos les minmes mouss'mins,
Tot comme les incurâbes et les p'tits orphulins ;
Po v'distraire, à l'nuteie, i n'âreut des prèh'nire
Ouisse qu'on beureut po rin dè l'bonne aiwe di gottire ;
On âreut tos les jôus, po d'juner l'à matin,
Çou qui crèh'reu dè l'nute avou l'choleure dè timps ;
On ireut s'porminer, pèhi tote li journeie,
Et po soper à l'cise on magn'reu dè l'foreie ;
Comme on n'ouveurreut pus, on n'si freut nin nâhi
Et nouk n'âreut pus d'keure di s'lèver ou d'doèrmi ;
On n'si cass'reut pu l'tiesse à fer dè l'politique,
Pusqui n'âreut pus rin, ni ârgint, ni botique ;
On vikreu comme tos frès, sins èvèie ni pârî,
Les feummes sèrit à pârî po n'in fer dè displi,
Et n'poris dè mon dire qui l'question sociale
Est résoûde ine bonne feie d'ine façon gènerâl ! . . .

Mins ji veus d'vins vos autes qu'ârit l'air di doter
Qu'ine veie tèle qui cisse la ni sâreut s'akmign'ter ! . . .
Et bin prindez eximpe à totes les biesses dè l'terre
Co mâie nolle n'a gèmi, fâte d'ârgint ou d'misère ;
Çou qui prouve qui les biesses, pus suteies qui les gins,
N'ont mâie volou des poches, po n'mâie avu d'ârgint.